

ԷԿՈՒՄԵՆԻԿ ՊԱՇՏՈՆՅԱՆԵՐԻ ՀԱՎԱՔ ԺՆԵՎՈՒՄ

Մայիսի 19-22-ը Ժնևում՝ Բոսնի Էկումենիկ դպրոցում, տեղի ունեցավ Եկեղեցիների Համաշխարհային Խորհրդի Էկումենիկ պաշտոնյաների հանդիպումը՝ «Խոստումի ժամանակից դեպի անապատային թափառումներ» թեմայով, որին մասնակցում էին ԵՀԽ անդամ Եկեղեցիների և Էկումենիկ կազմակերպությունների ներկայացուցիչներ։ Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի օրհնությամբ ժողովին մասնակցում էր Մայր Աթոռ Սուրբ Էջմիածնի Միջեկեղեցական հարաբերությունների գրասենյակի վարիչ Հոգեշնորհ Տ. Հովակիմ վարդապետ Մանուկյանը։ Մեծի Տանն Կիլիկիո Կաթողիկոսությունը ներկայացնում էր Գերաշնորհ Տ. Նարեկ եպիսկոպոս Ալեմեզյանը։

Մայիսի 19-ին ժողովականներն այցելեցին Ժնևում գտնվող ԵՀԽ կենտրոնական գրասենյակ, ուր հանդիպեցին ԵՀԽ Գլխավոր Քարտուղար դոկ. Սամուել Կոբիայի և Նոբելյան մրցանակակիր, Անգլիկան արքեպիսկոպոս Դեսմունդ Տոտտոի հետ։ Ժողովի ընթացքում մասնակիցները քննարկումների և ելույթների միջոցով ներկայացրեցին անդամ Եկեղեցիներում տեղի ունեցող ձեռքբերումներն ու Էկումենիկ հարաբերություններում առկա մարտահրավերները։ Անդրադարձան «Էկումենիզմը 21-րդ դարում» թեմային և լսեցին ԵՀԽ 60-ամյակի առիթով երիտասարդ երկու աստվածաբանների պատրաստած դասախոսությունները։

Ժողովականները հանդիպեցին նաև ԵՀԽ ծրագրերի տնօրեններին և ծանոթացան միջկրոնական երկխոսության, բոնությունը և աղքատությունը հաղթահարելու, կլիմայի փոփոխության և շրջակա միջավայրի պաշտպանության բնագավառներում իրականացվող ծրագրերին և կատարվող աշխատանքներին։ Առանձին քննարկումներ տեղի ունեցան «Հավատք և Կարգ», ինչպես նաև «Առաքելություն և Ավետարանում» հանձնախմբերի ղեկավարների հետ։

Տ. Հովակիմ վարդապետ Մանուկյանը հանդիպեց ԵՀԽ գլխավոր քարտուղար դոկ. Սամուել Կոբիայի և ԵԵԿ գլխավոր քարտուղար Վեր. Քոլին Վիլյամսի հետ։ Զրույցի ընթացքում անդրադարձ կատարվեց նաև Վրաստանի կրոնական կյանքին և մասնավորապես Վիրահայոց թեմի կարգավիճակին ու հայկական եկեղեցիների հետ կապված խնդիրներին։

ՄԱՅՐ ԱԹՐՈՒ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ